

卯 13

4642.

景岳新方砭下

景岳新方砭卷三

長樂陳念祖修園甫著

仁和葛元煦理齋校訂

熱陣

四味回陽飲 治元陽虛脫危在頃刻者

人參

一二兩

製川附子

一二錢

甘草

一二錢

乾薑

二三錢炮

水二鍾武火煎七分溫服徐徐飲之

陳修園曰仲景一百一十三方用人參者只有一

十八方皆因汗吐下之後亡其津液取其甘寒以

救陰唯吳茱萸湯理中湯附子湯三方剛燥之中  
借其養陰以配陽蓋人參非補陽藥也讀神農本  
草經者自知景岳學淺心粗惑于李時珍能回陽  
氣于無何有之鄉之說遂視爲神丹每于救危之  
法必用之以致新定回陽二飲用至一二兩之多  
誤人無算昔人云不讀人間非聖書余自三十歲  
後所藏雜書俱付之一火今方自信其頗純也景  
岳四味回陽飲卽仲景四逆加人參湯特附子只  
用二三錢乾薑炮透人參用一二兩則荒唐甚矣

且四逆湯以生附配乾薑取其開闢羣陰迎陽歸  
舍交接十二經爲斬旂奪關之良將而以甘草爲  
主者從容籌畫所以盡其將將之能此峻劑中之  
緩劑也若倍加乾薑則爲通脈四逆湯以此時生  
氣已離亡在頃刻若以柔緩之甘草爲君豈能疾  
呼散陽而使返耶故倍用乾薑而仍不減甘草者  
恐散渙之餘不能當乾薑之猛還藉甘草以收全  
功也二方俱不加人參者慮陰柔之品反減薑附  
之力而論中有四逆加人參者以其利止亡血而

加之也茯苓四逆湯亦少佐以人參者以其煩躁在汗下之後也景岳不明此理妄立四味回陽飲以誤人余亦姑置弗辯只明四逆湯爲回陽正法弗辯深于辯也

六味回陽飲 治陰陽將脫等證

人參

一二兩或數錢

製附子

一二錢

炮乾薑

二三錢

甘草

一錢炙

熟地

五錢或一兩

當歸身

三錢如泄瀉者或血動者以冬白朮易之多多益善

水二鍾武火煎七分溫服

陳修園曰凡人將死之頃陽氣脫而陰氣必盛其

時大汗不止爲水洩于外痰涎如湧爲水泛于上  
水陰氣也陽主生而陰主死人將死全是陰氣用  
事或見命痰或見冷汗故仲景于汗不止症必用  
茯苓以泄水泄水卽所以抑陰也真武湯茯苓桂  
枝白朮甘草湯茯苓甘草湯皆因汗出而同用茯  
苓當悟其不言之妙而痰多加茯苓師有明訓無  
庸余之再論也景岳不知回陽之義法在抑陰反  
用膠粘之熟地甘寒之人參大助陰氣令一綫之  
殘陽頃刻爲羣陰剝滅而死人與爾何仇必欲置

之死地乎卽云方中亦有薑附其實數錢之薑附  
安能敵數兩之地黃哉仲景四逆湯薑附湯白通  
湯等皆回陽法人參且不輕加況地黃乎

理陰煎 此理中湯之變方也

熟地 三五七錢 或一二兩 當歸 二三錢 或五七錢 甘草 一二錢 乾薑 炒黃

色一 或加肉桂 一二錢

水二鍾煎七八分熱服

陳修園曰景岳自注治法云通治真陰虛弱此方  
頗有一二味合處又云脹滿嘔噦痰飲惡心吐瀉

腹痛等句與真陰虛弱句不相連貫總是要用熟地當歸不得不冥目混說也且云爲理中湯之變方宜剛燥者當用理中宜溼潤者宜用此方更謬夫上焦屬陽下焦屬陰而中焦則爲陰陽相偶之處參草甘以和陰薑朮辛以和陽辛甘相輔以處中則陰陽自然和順不曰溫中而曰理中明非剛燥之劑也景岳以庸耳俗目論藥不識剛柔燥溼之本素喜柔潤故以歸地易人參白朮而改其名曰理陰煎服之數劑則陰氣內壅而爲脹滿陰氣

上逆而爲嘔噦陰水汎溢而爲痰飲惡心陰盛于  
中則上下不交而吐瀉陰凝于內則陽不通而腹  
痛陰盛于下則關元不煖而血滯經遲不但不能  
治病且以增病又云眞陰不足或素多勞倦之輩  
因而忽感寒邪不能解散者用此溫補陰分使陰  
氣漸充則汗從陰達而寒邪不攻自散等語更屬  
無知妄作夫太陽主表爲心君之藩籬猶京都之  
有邊關也寒邪初感先入太陽之界仲景麻桂諸  
方汲汲以扶陽抑陰爲事法在發汗汗爲心液發

之所以行君主之令也以君主之陽內發則寒水之邪外散矣若從景岳之說以陰藥助陰邪不猶入井而下之石耶吾不解庸醫慣用此方日誤數人而仍不改輒者豈盡天良之斲喪抑亦惑于景岳誇大之言歸咎于病之深而莫救不自知其術之謬而殺人也

養中煎 治中氣虛寒爲嘔爲泄者

人參

一二錢

山藥

炒二錢

白扁豆

炒一錢

甘草

一錢

茯苓

二錢

乾薑

炒黃一錢

水二鍾煎七分食遠溫服

陳修園曰方亦平妥但云空虛覺餒者加熟地不

無可議耳

溫胃飲 治中寒嘔吐吞酸泄瀉不思飲食及婦人

臟寒嘔惡胎氣不安等證

人參二三錢 白朮炒一二錢 當歸一二錢 扁豆

二錢 陳皮一錢 乾薑炒焦一錢 甘草一錢

水二鍾煎七分食遠溫服

陳修園曰方佳而加減陋

五君子煎 治脾胃虛寒嘔吐泄瀉而兼溼者

人參二錢 白朮二錢 茯苓各二錢 甘草一錢 乾薑炒一錢

水一鍾半煎服

陳修園曰純粹亦可作丸

六味異功煎 治證同前而兼微滯者即前方加陳皮

陳修園曰方亦純

參薑飲 治脾肺胃氣虛寒嘔吐咳嗽氣短小兒吐

乳等證

人參三五錢 甘草三五分 乾薑炮五分或二三錢 或用煨生薑二三片

景岳新方 卷三  
水一鍾半煎七分徐徐服之

陳修園曰分兩不得法咳嗽者不可用

胃關煎 治脾腎虛寒作瀉或甚至久瀉腹痛不止

冷痢等證

熟地

或三五錢  
或一兩

山藥

炒二錢

白扁豆

炒二錢

甘草

一二錢

焦

乾薑

一二錢

吳茱萸

製五分

白朮

炒一二錢

水二鍾煎七分食遠溫服

陳修園曰古人製方最難景岳製方最易不論何方加入熟地卽云補腎治真陰不足加入人參卽

云補氣治元陽衰乏流俗喜其捷便其邪說至今  
不熄也此方于苦燥辛溫劑中君以熟地不顧冰  
炭之反便注云治脾腎虛寒作瀉陋甚

佐關煎 治生冷傷脾瀉痢未久腎氣未損者宜用

此湯以去寒溼安脾胃此胃關煎之佐者也

厚朴炒一錢 陳皮炒一錢 山藥炒二錢 甘草七分 猪苓二錢 澤

瀉二錢 乾薑炒一錢 肉桂一二錢

水一鍾半煎服

抑扶煎 治氣冷陰寒或暴傷生冷致成瀉痢凡初

起血氣未衰脾腎未敗或脹痛或嘔惡皆先用此  
湯此胃關煎表裏藥也宜察虛實用之其有寒溼  
傷臟霍亂邪實者最宜用此

厚朴 陳皮 烏藥 各一錢 猪苓 二錢 澤瀉 二錢 甘草

一錢 乾薑 炮一錢 吳茱萸 製五分

水一鍾半煎七分食遠服

陳修園曰佐關煎抑扶煎二方雖不甚龐雜但粗

淺甚不可為法

四維散 治脾腎虛寒滑脫之甚或泄痢不能止或

氣虛下陷二陰血脫不能禁者無出此方之右

人參

兩

製附子

二錢

乾薑

炒黃二錢

甘草

一錢

烏梅肉

五分

或一錢酌其味之微甚隨病人之意而用之或不用此即四味回陽飲也

右為末和勻用水拌溼蒸一飯頃取烘乾再為末

每服一二錢溫湯調下

陳修園曰四維散即四味回陽飲加烏梅是也但

彼用之以回陽則誤此用之以救陰則得蓋久痢

與二便血脫人參是其要藥也烏梅亦用得確當

鎮陰煎 治陰盛于下格陽于上則真陰失守血隨

而溢以致大吐大衄六脈細脫手足厥冷危在頃刻而血不能止者速宜用此使孤陽有歸則血自安也如治格陽喉痺上熱者當以此湯冷服

熟地二二三兩 牛膝二二三錢 甘草一錢 澤瀉一錢半 肉桂一錢 製

附子五七分或一二三錢

水二鍾速煎服

陳修園曰此方從八味地黃丸套來方面却亦不雜但初服效二三服不甚效四五服反劇何則景岳謂陰虛于下陽格于上亦古人之相沿之陳語

其實是陽虛于上陰氣乘之邪火因而竊動忽得  
桂附扶胸中之陽如太陽一出燭火無光故初服  
而效再服不效者習以爲常也四五服反劇者桂  
附陽藥之少不敵地黃陰藥之多也或問陰藥數  
倍于陽藥陽藥掣肘宜其不效何以前效而後不  
效歟曰陰藥性柔而行緩緩則相續而不絕陽藥  
性剛而行急急則迅發而無餘初服一劑地黃讓  
桂附以先走但見桂附之扶陽若忘地黃之滋陰  
故驟投見效至于再服桂附雖烈無如前日之地

黃緩行未了又得新入之地黃以助之勢可相敵  
故再服不甚見效服至四五劑而反劇奈何蓋以  
每日所服之桂附如火一發而無餘而同劑中之  
地黃如水之漸注而不驟日積日多些少之桂附  
安能與之為敵宜其服之反劇也馮氏全真一氣  
湯與此相仿皆非善方

歸氣飲 治氣逆不順呃逆嘔吐或寒中脾腎等證

熟地三錢 茯苓二錢 扁豆二錢 乾薑炮 丁香 陳皮各一錢

錢 藿香一錢 甘草八分

水一鍾半煎七分食遠溫服

陳修園曰氣逆不順用熟地之粘膩不更滯其氣乎且與諸藥之氣味不相投合不能取效

煖肝煎 治肝腎陰寒小腹疼痛疝氣等證

當歸

二錢

枸杞

三錢

茯苓

二錢

小茴香

二錢

肉桂

二錢

烏藥

二錢

沉香

一錢

或木香亦可

水一鍾半加生薑三五片煎七分食遠溫服

陳修園曰俗醫以此方奉為枕中之秘試問服此

方而愈者有幾人乎仲景當歸四逆湯理中去朮

加附湯聖法俱在何因陋就簡乃爾也

壽脾煎 一名攝營煎 治脾虛不能攝血等證凡

憂思鬱怒積勞及誤用攻伐等藥犯損脾陰以致  
中氣虧陷神魂不甯大便脫血不止或婦人無火  
崩淋等證凡兼嘔惡尤為危候速宜用此單救脾  
氣則統攝固而血自歸源此歸脾湯之變方其效  
如神若患此證而再用寒涼則胃氣必脫無不即

斃者

白朮 二錢 當歸 二錢 山藥 二錢 甘草 一錢 棗仁 一錢 遠志

錢

錢

錢

錢

半

錢

製三分乾薑炮二錢蓮肉去心炒二十粒人參隨宜一二錢急者用一兩

水二鍾煎服

陳修園曰方雖庸淺却不雜

三氣飲 治血氣虧損風寒濕三氣乘虛內侵筋骨

歷節痺痛之極及痢後鶴膝風痛等證

當歸 枸杞 杜仲各二錢 熟地二錢或五錢 牛膝 茯

苓 芍藥 酒炒肉桂各一錢 細辛或代以獨活 白芷 甘草

各一錢 附子隨宜一錢

水二鍾加生薑三片煎服

陳修園曰風寒溼三氣雜至為痺而溼為之主痺者脾病也方中歸地枸杞牛膝非脾病所宜

五德丸 治脾腎虛寒飧泄驚漉等證或暴傷生冷

或受時氣寒溼或酒溼腹痛作泄或飲食失宜嘔

惡痛泄無火等證

補骨脂四兩 吳茱萸製三兩 木香二兩 乾薑四兩 北五

味二兩 或以肉豆寇代之麵炒用或用烏藥亦可

湯浸蒸餅丸桐子大每服六七十丸甚者百餘丸

白滾湯或人參湯或米湯俱可下

陳修園曰方從四神丸加減亦簡便可從

七德丸 治生冷傷脾初患瀉痢肚腹疼痛凡年壯

氣血未衰及寒溼食滯凡宜和胃者無不神效

台烏藥 吳茱萸製 乾薑炒黃 蒼朮炒各二錢 木香 茯苓

苓各一兩 補骨脂炒四兩

神麩糊丸桐子大每服七八十丸或百丸滾湯送

下

陳修園曰不如前方之純

復陽丹 治陰寒嘔泄及腹痛寒疝等證

附子製 乾薑炮 胡椒 五味炒 甘草各一兩 白麵二兩

熟炒

右為末和勻入溫湯搗丸桐子大每服一錢隨證用藥引送下

陳修園曰彙集熱藥而不得法

黃芽丸 治脾胃虛寒或飲食不化或時多脹滿泄

瀉吞酸嘔吐等證此隨身常用妙藥

人參一兩 焦乾薑三錢

煉白蜜為丸芡實大常嚼服之

陳修園曰此與一炆丹俱是溫補時方宜薑附倍  
于人參則得法乾薑不宜炒焦

一炆丹 治脾腎虛寒不時易瀉腹痛陽痿怯寒等

證

人參 製附子 各等分

煉白蜜丸如綠豆大每用白滾湯送下五分或一  
錢凡藥餌不便之處或在途次隨帶此丹最妙

九炆丹 治脾腎虛寒如五德丸之甚者

熟地八兩 製附子四兩 肉豆寇麵炒 焦薑 吳茱萸

補骨脂

酒炒

葦芩

炒

五味

炒各二兩

粉甘草

炒一兩

吳茱萸

煉白蜜為丸或山藥糊丸如桐子大每服六七十

丸或百丸滾白湯下

陳修園曰此即五德加熟地肉豆寇葦芩甘草等

方雜而效不著

溫臟丸 治諸虫積既逐而復生者多由臟氣寒宜

溫健脾胃以杜其源此方主之

人參

隨宜用無亦可

白朮

米泔浸炒

當歸

各四兩

茯苓

川椒

去合

口者炒

細榧肉

史君子

煨取肉

檳榔

各三兩

乾薑

炒

吳茱萸

湯泡一宿  
各一兩

右爲末神麩糊爲丸桐子大每服五七十丸或百  
丸飢時白滾湯下

陳修園曰彙集殺虫之標劑而加以參歸薑茱溫  
補之藥爲主是景岳之識見高處但不如仲景烏  
梅丸之神也

聖朮煎 治飲食偶傷或吐或瀉胸膈痞悶或脇肋  
疼痛或過用剋伐等藥致傷臟氣有同前症而脈  
息無力氣怯神倦者速宜用此不得因其虛痞虛

脹而畏用白朮此中虛實之機貴乎神悟也若痛  
脹覺甚者即以此煎送神香散最妙若用治寒溼

瀉痢嘔吐尤為聖藥

白朮

用冬白朮味甘佳者五  
六七錢炒或一二兩

乾薑

炒

肉桂

各一  
二錢陳

皮

酌用或  
不用

水一鍾半煎七分溫服

陳修園曰此方可直追古方新方而盡類此吾何

間焉

固陣

秘元煎 治遺精帶濁等病此方專主心脾

遠志

入分炒

山藥

二錢炒

芡實

二錢炒

棗仁

炒搗碎二錢

白朮

炒茯苓

各錢半

甘草

一錢

人參

二錢

五味

十四粒畏酸者去之

金櫻

子

去核二錢

水二鍾煎七分食遠服

陳修園曰彙集補藥及固澁之品板實不靈

固陰煎 治陰虛滑泄帶濁淋遺及經水因虛不固

等證此方專主肝腎

人參

隨宜

熟地

三五錢

山藥

炒二錢

山茱萸

一錢半

遠志

隨宜

甘草

錢一二

五味

粒十四

兔絲子

炒香二錢三

水二鍾煎七分食遠溫服

陳修園曰陰虛古人多指太陰而言亦有指少陰而言黃連鷄子黃湯猪苓湯真武湯四逆湯等法皆言治少陰之為病不啻言治傷寒也景岳言之易易只一熟地盡之吾聞相習成風凡入門看病病家必告之曰向係陽虛向係陰虛醫者體其所言陽虛而用人參白朮黃芪等藥陰虛而用地黃當歸山藥等藥則以為良醫此醫風之大壞也患

夢遺帶濁及經水不固者照景岳固陰煎寫來人  
人稱善可以藏短可以騙人誠糊口之良法也更  
有巧者謂服熟地猶恐減食而何首烏不寒不燥  
功居地黃之上地黃炒鬆及炒黑用之能補腎又  
不泥膈或以砂仁附子沉香木香白芥子拌搗以  
此迎合富貴之家名實兩收巧矣而醫道由  
若輩而廢實可痛恨

兔絲煎 治心脾氣弱凡遇思慮勞倦卽苦遺精者

宜此主之

人參錢二三 山藥炒二錢 當歸錢半 兔絲子製炒四錢 棗仁

炒 茯苓各錢半 甘草一錢或五分 遠志製四錢 鹿角霜為末每服

加入四 五匙

右用水一鍾半煎成加鹿角霜末調服食前服

陳修園曰方雖板實却不支離

惜紅煎 治婦人經血不固崩漏不止及腸風下血

等證

白朮 山藥 甘草 地榆 續斷 芍藥

五味粒十四 荊芥穗炒 烏梅一枚

水一鍾半煎七分食遠服

陳修園曰方皆渣滓無用之品卽有朮草同行其如彼眾我何寡哉

芎朮兔絲丸 治脾腎虛損不能收攝以致夢遺精

滑困倦等證

白茯苓

白朮

米泔洗炒

蓮肉

去心各四兩

五味

二兩酒浸

山藥

炒二兩

杜仲

酒炒三兩

甘草

五錢

兔絲子

用好水淘淨入陳酒浸一日文火煮

極爛搗爲餅焙乾爲末十兩

右用山藥末以陳酒煮糊丸桐子大空心滾白湯

或酒下百餘丸

固真丸 治夢遺精滑

兔絲餅

一斤淘淨用好酒浸三日煮極熟  
搗膏晒乾或用淨白布包蒸亦佳 牡蠣煨

兩

金櫻子

去核蒸  
熟四兩 茯苓

酒拌蒸  
晒四兩

煉蜜丸空心好酒送下三錢或淡鹽湯亦可

陳修園曰苓朮兔絲丸固精丸景岳所得意者以

兔絲子之補而能固也余攷神農本草經會其言

外之旨知其有潤燥之功無固澹之用李士材謂

性溫陽事易舉者勿用又謂其溫澁大便燥乾者

勿用皆臆說也然余自臨症以來亦見市醫用二  
丸治遺精久服亦有效者奈何蓋以兔絲子多脂  
之物多脂則能補精精與神猶魚水之相得但使  
精不枯竭則神有所依而不妄動神不妄動則精  
自安其室而不搖非謂兔絲子能止澁之也特其  
功甚緩而不足賴耳金櫻子牡蠣蓮肉荅朮等藥  
醫者共知無庸再釋

粘米固腸糕 治脾胃虛寒或因食滯氣滯脹痛泄  
瀉久不止者多服自安

用白糯米滾湯淘洗炒香熟為粉每粉一兩加乾  
 薑末炒熟者二分半白糖二錢拌勻于飢時用滾  
 水調服一二兩如有微滯者加陳皮炒末二分或  
 砂仁末一分俱妙

陳修園曰山谷便方自不可廢

玉關丸 治腸風血脫崩漏帶濁不固諸藥難效者  
 宜用此丸兼前藥治之及瀉痢滑泄不能止者亦  
 宜用此

白麵炒熟 枯礬二兩 文蛤醋炒黑 五味子一兩 訶子炒

二兩半  
生半炒

右為末用滾湯和丸桐子大以溫補脾腎等藥隨  
證加減煎湯送下或人參亦可

陳修園曰除白麵外皆極酸之品恐過瀉而增火  
古人有大封大固之法以苦藥為主不可不知

鞏提丸 治膀胱不藏水泉不止命門火衰小水不

禁等證

熟地二兩 兔絲子酒煮二兩 炒白朮二兩 五味 益智仁酒炒

故紙酒炒 附子製 茯苓 家韭子炒各一兩

固本丸  
七

右為末山藥糊丸桐子大每服百餘丸空心滾湯

或溫酒下

陳修園曰方頗佳以人參易熟地更妙

敦阜糕 治久瀉久痢腸滑不固妙方及婦人帶濁

最佳

白麵炒黃二兩冬白朮炒黃二兩破故紙炒五錢

右共為末臨服時加白糖隨宜用清滾湯食前調

服如糕法如胃寒者每一兩加乾薑炒末五分或

一錢如氣有不順或痛或嘔每末一兩加丁香一

錢如滑泄不禁者每兩加粟殼末炒黃一錢若以  
作丸則宜三味等分則名敦阜丸

陳修園曰庸庸之見絕無意義

景岳新方砭卷三

葛氏嘯園藏板

景岳新方砭卷四

長樂陳念祖修園甫著

仁和葛元煦理齋校訂

因陣

逍遙飲 治婦人思鬱過度致傷心脾衝任之源血

氣日枯漸至經脈不調者

當歸二錢 芍藥二錢 熟地五錢 棗仁二錢 茯神半錢

遠志製三分 陳皮八分 甘草一錢

水二鍾煎七分食遠溫服

陳修園曰思則脾結土鬱奪之鬱則傷肝木鬱達之若思鬱過度病久而虛則宜調養土木之氣令土木無忤以成復卦爲妙茲方地黃之滯非所宜也經脈不至責在陽明而衝任與脾皆於陽明中求其治法非歸地芍草等可畢乃事也然陽明特流行停聚之處爲坎流之所而非蒙泉惟心孔中有眞血數滴穀氣經歷其所卽蒸而爲血以灌注諸經亦非扶神遠志棗仁之套藥可治也大抵經滯而不行取之陽明血枯而經閉先取少陰後取

陽明內經烏鰂鮑魚茜草面面周到丸以雀卵以  
朱雀爲南方之神其卵渾然一太極絕大意義于  
數味中指示之學者得其意則有其方非以此四  
味爲印板也余自臨症以來每見服逍遙飲而致  
癆者指不勝屈宜迸絕之

決津煎 治婦人血虛經滯不能流暢而痛極者當  
以水濟水若江河一決而積垢皆去宜用此湯隨  
證加減主之

當歸

三五錢  
或一兩

澤瀉

一錢  
半

牛膝

二錢

肉桂

一二錢

熟地

三錢

錢或五七錢 烏藥一錢如氣虛者不用亦可

水二鍾煎七分食前服

陳修園曰天下無兩可之理景岳此方予庸師藏

拙之術而不知實者得此為實實虛者得此為虛

虛誤事在此

五物煎 治婦人血虛凝滯蓄積不行小腹痛急產

難經滯及痘瘡血虛寒滯等證神效

當歸三五錢 熟地三四錢 芍藥二錢 川芎一錢 肉桂二三錢

水一鍾半煎服

陳修園曰方純可用而分兩多寡不得法

調經飲 治婦人經脈阻滯氣逆不調多痛而實者

當歸 三五錢 牛膝 二錢 山查 一二錢 香附 二錢 青皮 茯苓

各一錢半

水二鍾煎七分食遠服

通瘀煎 治婦人氣滯血積經水不利痛極拒按及

產後瘀血實痛並男婦血逆血厥等證

歸尾 五七錢 山查 香附 紅花 新者炒黃 各三錢 烏藥 二

錢 青皮 半錢 木香 七分 澤瀉 半錢

因陣

陳修園曰經脈不行虛則補而實則攻熱則寒而寒則熱調經通瘀二煎畏首畏尾不足法也

胎元飲 治婦人衝任失守胎元不安不固者隨證

加減用之或間日或二三日常服一二劑

人參隨宜當歸 杜仲 芍藥各二錢 熟地二三錢 白朮

錢半甘草一分無滯者不必用 陳皮七分

水二鍾煎七分食遠服

固胎煎 治肝脾多火多滯而屢墮胎者

黃芩二錢 白朮一二錢 當歸 芍藥 阿膠各錢半 陳皮

一錢砂仁五分

水一鍾半煎七分食遠溫服

陳修園曰胎受氣于脾仲景金匱以白朮之燥爲主可知熟地之溼非脾之所喜也白朮散養胎佐蜀椒以治寒溼當歸散常服佐黃芩以治溼熱皆聖法也景岳胎元飲亦倣于白朮散但不用辛熱之蜀椒而加溼滯之熟地則違聖法矣固胎煎涼胎飲亦倣于當歸散但一用阿膠而雜以橘砂一用生地而雜以枳殼則又違聖法矣且金匱妊娠

其十方而丸散居七湯居三即此是法景岳未之

知也

滑胎煎 胎氣臨月宜常服數劑以便易生

當歸 三五錢 川芎 七分 杜仲 二錢 熟地 三錢 枳殼 七分 山藥 二錢

水二鍾煎八九分食前溫服

陳修園曰此方遜保生無憂散多矣未解景岳製

此方何意

殿胞煎 治產後兒枕疼痛等證如神

當歸 五七錢 川芎 甘草 各一錢 茯苓 一錢 肉桂 一二錢 或一兩

分五七

水一鍾煎八分熱服

陳修園曰方平而功大

脫花煎 凡臨盆將產者宜先服此藥催生最佳并

治產難經日或死胎不下俱妙

當歸七八錢肉桂一二錢川芎各二錢牛膝各二錢車前

子錢紅花一錢催生者不半用此味亦可

水二鍾煎八分熱服或服後酒數杯亦妙

陳修園曰去牛膝加百草霜更純

九蜜煎 治產後陽氣虛寒或陰邪入臟心腹疼痛

嘔吐不食四肢厥冷

當歸

熟地

各三錢

芍藥

酒炒

茯苓

各錢半

甘草

乾薑

炒

肉桂

細辛

各一錢

吳茱萸

製五分

水一鍾煎服

陳修園曰據景岳自注病症非四逆湯通脈四逆

湯白通加入尿猪膽汁湯吳茱萸湯擇用不可若

此湯龐雜不能倖效

清化飲

治婦人產後因火發熱及血熱妄行陰虧

諸火不清等證

芍藥

麥冬

各二錢

丹皮

茯苓

黃芩

生地

各二錢

三錢 石斛 一錢

水一鍾半煎七分食遠溫服

陳修園曰此方彙寒藥毫無意義不堪以治大病  
唯駁丹溪芍藥酸寒大伐生氣產後忌用之說是  
聰明善悟處又云芍藥之寒不過于生血藥稍覺  
其清耳微酸而收最宜于陰氣散失之症為產後  
之要藥等說則與經旨不合本草經謂芍藥氣味

苦平氣平則主降味苦則下降而走血爲攻下之  
品非補養之物也經中所列主治邪氣腹痛除血  
痺破積等句聖訓彰彰可攷若產後瘀血未淨邪  
氣發熱腹痛小便赤短等症誠爲要藥若陰氣散  
失泄瀉無度小便清白等症用之則大誤矣景岳  
雖聰明過人而未讀本草經其論藥卽有偶中之  
處終覺瑕瑜參半

毓麟珠 治婦人氣血俱虛經脈不調或斷續或帶  
濁或腹痛或腰痠或飲食不甘瘦弱不孕服一二

斤即可受胎凡種子諸方無以加此

人參

白朮

土炒

茯苓

芍藥

酒炒各二兩

川芎

甘草

各一兩

當歸

熟地

蒸搗

兔絲子

製各四兩

杜仲

酒炒

鹿角霜

川椒

各二兩

右為末煉蜜丸如彈子大每空心嚼服一二丸酒湯送下或為小丸吞服亦可

陳修園曰水與土相演而生草脾與腎相和而生人兔絲子脾腎兼補而能使水土不戾毓麟珠取之為君所以奏效如神也兔絲子可用八兩

贊育丹 治陽痿精衰虛寒無子等證妙方

熟地 入兩 蒸搗 白朮 用冬白朮 八兩 當歸 枸杞 各六兩 杜仲 酒炒

仙茅 酒蒸 一日 巴戟天 甘草湯炒 吳茱萸 淫羊藿 羊脂拌炒

肉蓯蓉 酒洗 去甲 韭子 炒黃 各四兩 蛇床子 微炒 附子 製 肉桂

各二兩

右煉蜜丸服 或加人參鹿茸更妙

陳修園曰溫補之品太多藥板實則功反緩

柴歸飲 治痘瘡初起發熱未退無論是痘是邪疑

似之間均宜用此平和養營之劑以為先着有毒

者可托有邪者可散實者不致助邪虛者不致損

氣

當歸

二二三錢

芍藥

或生或炒一錢半

柴胡

一錢或錢半

荆芥穗

一錢

甘草

七分或一錢

水一鍾半煎服或加生薑三片

疎邪飲

治痘疹初發熱凡血氣強盛無藉滋補者

單宜解邪用此方為主以代升麻葛根湯及蘇葛

湯等方最為妥當

柴胡

倍用

芍藥

倍用酒炒

蘇葉

荆芥穗

甘草

減半

水一鍾半煎服

涼血養營煎 治痘疹血虛血熱地紅熱渴或色燥

不起及便結溺赤凡陽盛陰虛等證悉宜用此

生地黃 當歸 芍藥 生甘草 地骨皮

紫草 黃芩 紅花

水一鍾半煎服童兒大小加減用之

柴葛煎 治痘疹表裏俱熱散毒養陰及瘟疫等證

柴胡 乾葛 芍藥 黃芩 甘草 連翹

水一鍾半煎溫服

搜毒煎 解痘疹熱毒熾盛紫黑乾枯燥便結純陽

等證

紫草 地骨皮 牛蒡子杵 黃芩 木通 連翹

蟬退 芍藥等分

水一鍾半煎服

六物煎 治痘疹血氣不充隨證加減用之神效不

可盡述并治男婦氣血俱虛等證

甘草 當歸 熟地或用地 川芎三四分 芍藥俱宜加減

人參或有或無隨虛實用 之氣不虛者不必用

右咀用水煎服

六氣煎 治痘瘡氣虛癢癩倒陷寒戰咬牙并治男

婦氣虛寒等證

黃芪炙 肉桂 人參 白朮 當歸 甘草

右咀水煎服

九味異功煎 治痘瘡寒戰咬牙倒陷嘔吐泄瀉腹

痛虛寒等證

人參二二三錢 黃耆炙一錢 當歸 熟地各二三錢 甘草七分

錢 丁香三五分 肉桂一錢 乾薑炮一錢 附子製一錢

或一錢

右量兒大小加減用水一鍾半煎七分徐徐服之  
透邪煎 凡麻疹初熱未出之時惟恐悞藥故云未  
出之先不宜用藥然解利得宜則毒必易散而勢  
自輕減欲求妥當當先用此方為主

當歸 二三錢 芍藥 酒炒一錢 防風 七分 荆芥 一錢 甘草 七分

麻 三分

水一鍾半煎服

陳修園曰熟于仲景傷寒論而痘疹之治自有源  
頭不然如活幼心法保赤全書種痘新書視諸書

雖高一格猶未免逐末而忘本也景岳不熟仲景  
書而臆言痘疹所以治痘有柴歸飲疎邪飲涼血  
養營煎柴葛煎搜毒煎治疹有透邪煎之妄卽六  
物煎六氣煎九味異功煎亦爲習俗所囿非善方  
也能治傷寒卽能醫痘疹侶山堂彙辯亦有是說  
非余之牴論

牛膝煎 截瘡大效凡邪散已透而血氣微虛者宜  
此主之

牛膝

錢二

當歸

陳皮

錢

各三

右用好酒一鍾浸一宿次早加水一鍾煎至八分

溫服

何人飲 截瘡如神凡氣血俱虛久瘡不止或急欲

取效者宜此主之

何首烏 自三錢以至一兩隨輕重用之 當歸 二錢 人參 三五錢或一兩隨用

陳皮 二三錢大虛者不必用 生薑 煨二片多寒者用三五錢

水二鍾煎八分于發前二三時溫服之

追瘡飲 截瘡甚佳凡血氣未衰屢散之後而瘡有

不止者用此截之已經屢驗

何首烏

一兩製

當歸

甘草

半夏

青皮

陳皮

柴胡

各三錢

右用井水河水各一鍾煎一鍾相亦如之同露一

宿次早溫服一鍾飲後食遠再服一鍾

木賊煎 凡瘡疾形實氣強多溼多痰者宜此截之

大效

半夏

青皮

各五錢

木賊

厚朴

各二錢

白蒼朮

檳榔

各一錢

用陳酒二鍾煎八分露一宿于未發之先二時溫

服

陳修園曰牛膝煎何人飲追瘡飲木賊煎皆通套之方未甚精切若有病輕未經親疹錄症以索方者不妨以此方應之

牙皂散 治胃脘痛劇諸藥不效者服此如神

用牙皂燒存性以煙將盡爲度研末用燒酒調服一錢許卽效

荔香散 治疝氣極痛凡在氣分者最宜用之并治小腹氣痛等證如神

荔枝核

炮微焦

大茴香

等分炒

右爲末用好酒調服二三錢

陳修園曰牙皂散荔枝香散爲止痛之標劑一二服未效者不可再投

豕膏 內經曰癰發于噙中名曰猛疽不治化爲膿膿不寫塞咽半日死其化膿者寫則合豕膏冷食三日已 此必以猪板油煉淨服之也

又萬氏方 治肺熱暴瘡 用猪脂一斤煉過入白蜜一斤再煉少頃濾淨冷定不時挑服一匙卽

愈 按此方最能潤肺潤腸凡老人痰嗽不利及  
大腸秘結者最宜用之

又千金方 治關格閉塞 用猪脂薑汁各二升  
微火煎至二升加酒五合和煎分服

陳修園曰方超

罨傷寒結胸法 凡病傷寒結胸其有中氣虛弱不  
堪攻擊內消者須以此法外罨之則滯行邪散其  
效如神

葱白頭

生薑

生蘿蔔

此味加倍如  
無以子代之

右用葱薑各數兩蘿蔔倍之一處炒熱用手巾或  
白布包好作大餅罨胸前脹痛處此藥須分三包  
冷則輪換罨之無不即時開通汗出而愈但不宜  
太熱恐其難受也又法以大蒜一二十頭搗爛攤  
厚紙或厚絹上貼于脹處少頃卽散用治一切脹  
痛無不神效

陳修園曰圍藥之法雖不足恃亦不可廢若蒸臍  
法則斷斷不可行也

連翹金貝煎 治陽分癰毒或在臟腑肺膈胸乳之

間者此方最佳甚者連用數服無有不愈

金銀花

貝母

土者更加

蒲公英

夏枯草

各三錢

紅藤

七八錢

連翹

一兩或五七錢

用好酒二碗煎一碗服後煖臥片時

連翹歸尾煎治一切無名癰毒丹毒流注等毒有

火者最宜用之

連翹

七八錢

歸尾

三錢

甘草

一錢半

金銀花

紅藤

各四錢

用水煎服如前

橘梗杏仁煎

此桔梗湯之變方也

治咳嗽膿痰

中帶血或胸膈隱痛將成肺癰者此方為第一

桔梗 杏仁 甘草 各一錢 阿膠 金銀花 麥冬

百合 夏枯草 連翹 各三錢 土貝母 三錢 枳殼 錢半

紅藤 三錢

水二鍾煎八分食遠服

當歸蒺藜煎 治癰疽瘡疹血氣不足邪毒不化內

無實熱而腫痛淋漓者悉宜用之此與芍藥蒺藜

煎相為奇正也當酌其詳

當歸 熟地 芍藥 酒炒 何首烏 各二錢 甘草 防風

川芎 荆芥穗 白芷 各一錢 白蒺藜 炒搗碎二錢或五錢

右或水或酒用二鍾煎服然水不如酒或以水煎服後飲酒數杯以行藥力亦可

芍藥 蒺藜 煎 治通身溼熱瘡疹及下部紅腫熱痛

諸瘡神效外以蜈蚣粉敷之

龍膽草 梔子 黃芩 木通 澤瀉 芍藥

生地 各二錢 白蒺藜 連刺搗碎五錢甚者一兩

水二鍾煎八分食遠服

降癰散 治癰疽諸毒消腫止痛散毒未成者即消

已成者斂毒速潰可愈若陽毒熾盛而疼痛勢凶者宜先用此方其解毒散毒之功神效最速若堅頑深固者宜用後方

薄荷

辛佳者用葉

野菊花

連根葉各一握

土貝母

半之

茅根

一握

右乾者可為末鮮者可搗爛同貝母研勻外將茅根煎濃湯去渣用調前末乘熱敷患處仍留前剩湯頓煖不時潤于藥上但不可用冷湯冷則不散不行反能為痛約敷半日即宜換之真妙方也  
後方凡疽毒堅頑深固及結核痰滯宜用此方

腦荷倍用生南星

土貝母

朴硝各等分

石灰風化者加

倍用或倍  
倍用之

右同為末用鹽溲調杵稠粘敷患處經宿乾即易  
之不必留頭若膿成者留頭亦可或炒熱攤絹上  
隔絹貼之亦可或用麻油調或用熱茅根湯調亦  
可若欲止痛速效加麝香或冰片少許更妙

百草煎 治百般癰毒諸瘡損傷疼痛腐肉腫脹或

風寒溼氣留聚走注疼痛等證無不奇效

百草 凡田野山間者無論諸品皆可取用然猶

以山草爲勝辛香者佳冬月可用乾者須預爲收採之

右不論多寡取以多煎濃湯乘熱薰洗患處仍用布帛蘸熨良久務令藥氣蒸透然後敷貼他藥每日二三次不拘但以頻數爲善蓋其性之寒者可以除熱熱者可以散寒香者可以行氣毒者可以解毒無所不用亦無所不利湯得藥性則湯氣無害藥得湯氣則藥力愈行凡用百草以煎膏者其義亦用此此誠外科中最要最佳之法亦傳之方

外人者也

螬蛸散 治溼熱破爛毒水淋漓等瘡或下部腎囊

足股腫痛下疳諸瘡無不神效

海螬蛸

不必浸淡

人中白

或人中黃礪砂亦可等分

右爲細末先以百草煎多煎濃湯乘熱薰洗後以此藥摻之如乾者以麻油或熬熟猪油或蜜水調敷之

腸癰秘方 凡腸癰生于小肚角微腫而小腹隱痛

者是若毒氣不散漸大內攻而潰則成大患急宜

以此藥治之

先用紅藤一兩許以好酒二碗煎一碗午前一服

醉臥之 午後用紫花地丁一兩許亦如前煎服

後痛必漸止為效然後服後末藥除根神效

當歸五錢 蟬退 殭蚕各二錢 天龍 大黃各三錢 石蠆

吧五錢此草藥也 老蜘蛛二個捉放新瓦上以酒鍾蓋定外用火煨乾存性

右共為末每空心用酒調送一錢許逐日漸服自

消

槐花蕊 治楊梅瘡下疳神方

棉花瘡毒及下疳初感或毒盛經年難愈者用槐  
蕊揀淨不必炒每食前用清酒吞下三錢許早晚  
每日三服服至二三升則熱毒盡去可免終身餘  
毒之患亦無寒涼敗脾之慮此經驗神方也如不  
能飲即用滾水鹽湯俱可送下但不及酒送之效  
捷也

飛丹散 治寒溼風溼腳腿等證

飛丹 人中黃 輕粉 水粉

各等分

爲末凡溼爛者可以乾摻外用油紙包蓋 若乾

陷者以猪骨髓或猪油調貼之

繇花瘡點藥

杏仁 取霜 輕粉 真者

二味等分爲末敷于瘡上二三日卽痴脫而落又  
武定侯方用雄黃錢半杏仁三十粒去皮輕粉一  
錢同爲末用雄猪膽汁調敷三日卽愈百發百中  
天下第一方

陳修園曰自連翹金貝煎至此外科諸方俱佳

雞子黃連膏 治火眼暴赤疼痛熱在膚腠淺而易

解者用此點之數次可愈若熱由內發火在陰分者不宜外用涼藥非惟不能去內熱而且以閉火邪也用雞子一枚開一小竅單取其清盛以磁碗外用黃連一錢研爲細末摻于雞子清上用筋徹底速打數百使成浮沫約得半碗許卽其度矣安放少頃用筋撥開浮沫須出清汁用點眼皆勿得緊閉眼泡擠出其藥必熱淚湧出數次卽愈 稍加冰片尤妙 若雞子小而清少者加水二三匙同打亦可

陳修園曰此方治實熱症相宜然目視無光及昏  
黑倦視等證皆爲陽虛蓋心肺上焦之陽也心屬  
火火能燭物肺屬金金能鑑物二臟之陽不宣則  
火不能燭金不能鑑矣醫者不知以補血之藥滋  
腎下焦之陰愈盛則上焦之陽愈虛且令下焦之  
陰上加于天白晝如夜燭火有光陰雲四合龍雷  
飛騰欲滋陰以降火其實滋陰以助火則遂增出  
赤腫紅絲努肉羞明諸火象漸成廢疾矣方治詳  
于時方妙用不贅

余露散 治赤目腫痛翳障諸疾

天竹黃

擇辛香者用

海螵蛸

不必浸洗

月石

各一兩

飛硃砂

爐甘石

片子者佳煨淬童便七次飛淨各八錢

右為極細末磁瓶收貯每用時旋取數分研入冰

片少許諸目疾皆妙

陳修園曰此藥點目甚疼痛恐傷目不可用

二辛煎

治陽明胃火牙根口舌腫疼不可當先用

此湯漱之漱後傳以三香散抑或仍服清胃等藥

以治其本

細辛 三錢 生石膏 一兩

右二味用水二碗煎一碗乘熱頻嗽之

冰玉散 治牙疳牙痛口瘡齒齩喉痺

生石膏 一兩 月石 七錢 冰片 三分 殭蚕 一錢

右為極細末小磁瓶盛貯敷之吹之

冰白散 治口舌糜爛及走馬牙疳等證

人中白 倍用 冰片 少許 銅綠 用醋製者 杏仁 二味等分

右為細末敷患處

代匙散 治喉痺

月石 石膏 各一錢 腦荷 五分 膽礬 五分 粉草 三分 殭蚕 炒五分

分 冰片 一分 皂角 炙烟盡五分

右為細末用竹管頻吹喉中

三香散 治牙根腫痛

丁香 川椒 取紅等分 冰片 少許

右為末敷痛處

固齒將軍散 治牙痛牙傷胃火糜腫久之牢牙固

齒

錦紋大黃 炒微焦 杜仲 炒半黑 青鹽 四兩

右為末每日清晨擦嗽火盛者嚙之亦可

薰疥方

硃砂

雄黃

銀硃

各三分同研

大楓子

木鼈子

各三個

右將大楓子木鼈子先搗碎乃入前三味拌勻外以乾艾鋪捲成筒約長二寸許足矣凡薰時須將徧身疥癩悉行抓破薰之始效後五六日復薰一筒無不悉愈

杖丹膏

猪板油半斤黃占二兩輕粉三錢水銀三錢冰片三分

先將水銀輕粉同研細俟猪油熬熟去滓先下黃占鎔化後入末藥攪勻收貯以水浸二三時令出火毒用竹紙攤貼覺熱卽換輕者卽愈重者不過旬日

銀珠烟 治頭髮生虱及諸瘡之有虫者

用銀硃四五分揩擦厚紙上點着置一乾碗中上用一溼碗露縫覆之其烟皆着于溼碗之上乃用指揩擦髮中覆以毡帽則蟻虱皆盡矣 此烟以

棗肉和捻作餅或作丸擦于猪雞熟肝之間用貼諸瘡癬之有虫者及虫蝕肛門者以絲裹棗肉納肛門中一宿無不神效須留絲在外以便出之

雷火鍼 治風寒溼毒之氣留滯經絡而爲痛爲腫不能散者

五月五日取東引桃枝去皮兩頭削如雞子尖樣長一二寸許鍼時以鍼向燈上點着隨用紙三五層或布亦可貼蓋患處將熱鍼按于紙上隨卽念咒三遍病深者再燃再刺之立愈

咒曰天火地火三昧真火鍼天天開鍼地地裂鍼  
鬼鬼滅鍼人人得長生百病消除萬物消滅吾奉  
太上老君急急如律令

又雷火鍼新方乃以藥爲筒其法更妙

白芷 獨活 川芎 細辛 牙皂 川山甲

炮倍用 丁香 枳殼 松香 雄黃 乳香 沒藥

杜仲

桂枝

各一錢

硫黃

二錢

麝香

不拘

艾

二三兩

右搗爲粗末和勻取艾鋪底摻藥于上用上好皮  
紙捲筒先須用線絆約兩頭防其伸長然後加紙

再捍務令極實粗如雞子尖樣是其度也乃用雞

子清刷外層捲而裹之陰乾用法如前

疥癬 治疥瘡搽上即愈癬瘡亦妙

松香

一錢

水銀

硫黃

枯礬

各二錢

樟腦

二錢或一錢

麻油

右先將松香水銀加麻油少許研如糊後入三味

如膏擦之神效

鷺掌瘋四方

猪胰一具去油勿經水

花椒

二錢

右用好酒溫熱將二味同浸二三日取膜不時擦  
手微火烘之自愈

又方用白砒三錢打如豆粒以麻油一兩熬砒至  
黑去砒用油擦手微火烘不過二三次即愈

又方用葱五六根椎破再用花椒一把同入磁瓦  
罐中入醋一碗後以滾湯衝入薰洗數次即愈

又方用穀樹葉煎湯溫洗以火烘乾隨用柏白油  
擦之再以火烘乾少頃又洗又烘如此日行三次  
不過三五日即愈

秘傳水銀膏 擦治楊梅瘋毒爛潰危惡多年不愈

等證驗神方

黃柏 黃連 各一錢 川大黃 五分三 雄黃 膽礬

青黛 兒茶 銅青 各三分 輕粉 枯礬 各四分 大楓

子 去油取淨霜五分 珍珠 一分半 冰片 一分半 人

言 人壯者七厘弱者半分中者六厘

右十四味為極細末分作三分每分約一錢八分

番打麻另為末若瘡重而壯能食者每分用五分

人弱不起者每分用三分中者四分入前藥研勻

水銀人健者每分用一兩或八九錢中者或五六錢臥床不起而極弱者只可用三錢決不可再多矣

右先將麻汞并前藥各一分俱入盞內再入眞芝蔴油少許用手指研開務使汞藥混爲一家漸次增油久研以不見汞星爲度大約如稀糊可矣

一擦法用此藥擦手足四腕動脈處每藥一分務分擦三日每日早晚各擦一次每次以六七百數爲度擦完用布包之擦藥時凡周身略破傷處俱

用無麝膏藥須厚攤每二日一換換時不可經風  
當須避帳幔中冬月須用厚被煖炕他時亦須當  
煖南方則多用被褥蓋墊可也擦至七日毒必從  
齒縫中發出口吐臭涎若口齒破爛出血但用甘  
草蜂房煎湯候冷漱解不可嚥下輕者只以花椒  
湯漱之亦可擦處必皮破不可畏疼痛而少擦也  
忌鹽十餘日多更好并魚腥生冷動氣發風等  
物一個月尤忌房事外如牛肉燒酒團魚之類須  
忌二三年惟蕎麥麵羊肉則終身忌之 大麻風

亦可用

二十四味敗毒散

隨前水  
銀膏

當歸 川芎 生地 熟地 芍藥 牛膝 防

風 荆芥 白芷 防己 忍冬 桔梗 羌活

獨活 白癩皮 薏仁 連翹 木通 陳皮

粉草 黃蘗 知母 梔子 黃連

右每貼加土茯苓乾者四兩鮮者須半斤用水六  
碗煎三碗分三次每日早晚各服一碗 右方後  
四味隨其人之陰陽寒熱酌而用之

廉瘡隔紙膏

黃占五兩飛丹 鉛粉各四兩輕粉 乳香 沒藥

各二錢冰片二分麻油春夏二兩 秋冬三兩

右先將占油煎五六沸下乳沒再三沸下輕粉  
隨下丹粉槐柳枝攪十餘沸取起冷定後下冰片  
攪勻瓶盛浸一宿出火毒先以苦茶洗瘡淨將膏  
用薄油紙刺孔厚攤間日番背面貼之三日一換

三貼即可愈

完瘡散 治溼爛諸瘡肉平不斂及諸瘡毒內肉既

平而口有不收者皆宜用此最妙

滑石

飛一兩

赤石脂

飛五錢

粉甘草

三錢

右爲末乾摻或用麻油調敷 或加枯礬一錢痒

者極宜

若痒甚者必有虫先用水銀三四錢同松香二錢  
研勻後拌前藥和勻敷之

陳修園曰自二辛煎至此多俗傳之驗方有效有  
不效者寒熱虛實之不同也

景岳新方砭卷四終

葛氏嘯園藏板

上海縣東目耕齋刻

醫藥一道生死關頭差之毫釐失以千里稍涉不慎  
罪等草菅人命語云醫不三世不服其藥誠以讀書  
多而臨症久凡遇疑難危險症候胸有成竹自無失  
手之虞余幼年肄業經史之暇卽參究諸家醫書知  
歷代名醫著論立方莫不遵經師古間有標新立異  
處未嘗違背經旨惟景岳之新方八陣則大不然因  
此惴惴然數十年來未敢輕試且目覩今之世醫以  
景岳新方爲藍本者往往不效推原其故蓋景岳所  
創新方八陣不宗靈素不師仲景古聖之法蕩然無

存宜其爲後人所訾議也閩人陳修園先生以名吏而兼名醫曾將景岳新方痛加針砭糾繆繩愆不遺餘力俾世之閱景岳新方者知所從違其功實非淺鮮先生精于岐黃著書十數種廣行于世此編以措詞太激刊後復爲抽去茲余得其原本重行付梓庶羣疑盡釋名論不磨未始非指迷覺悟之一善舉也光緒三年丁丑仲夏之月仁和葛元煦識